

山右石刻叢編



所與譬猶賢人君子隨其所在而為利益故一方之水旱皆往而禱禱而必應古今靈驗不可勝數雖天之災祥固有定數然潔誠虔請隨其多寡而有顯化豈神之意不能違人之誠而汲汲於救物者蓋為其職事故耶上黨五龍祠舊云慕容永時有五方龍見於此山因以名山而立祠此方民貧而地确其須雨澤比它處倍甚而四時禱請輒應故一方之民恃五龍以為衣食今春涉夏時令過亢二楚幾槁民心嗷嗷陳留范公通守實攝州事率官吏齋宿而祈焉凡再往皆不及下山而雨旁及諸邑率報霑足苗之枯槁者變而豐美民之愁歎者起而謳歌矣夫以五龍之靈禱而必應固有素矣而未有如 范公之禱隨車而注者也然則神之靈異何其顯著而為此邦之福可勝道哉然而神像墻宇久不日治

府民成公濟等於是相率鳩材而繕之工不踰時廟貌煥然  
矣夫然神人之道相資而行神之福民者不替則報益重人  
之報神者不懈則福益遠神享其報民享其福知 范公之  
為惠則來者樂為之繼而神民之福報無盡矣

紹聖元年歲次甲戌五月一日

左宣德郎充潞州州學教授李夷行記

左承議郎通判潞州權發遣軍州事兼管內勸農事雲騎  
尉賜緋魚袋范鉞立石

進士李經書

進士令狐光世篆額

任道儀刊

碑陰

十九行行二  
十七字正書

紹聖一年四月二十六日丁卯禱雨口

祠下是日申刻雨遂霽霽旁及四境時同行僚屬及市民之  
在列者咸著於碑陰

左承議郎簽書昭德軍節度判官廳公事武騎尉賜緋魚  
袋程易

權潞州觀察支使成宇

潞州觀察推官尹文仲

左侍禁潞州管界巡檢兼巡捉私茶鹽礬王植

上黨縣令李惇信

司戶叅軍張山

上黨縣主簿韓景融

上黨縣尉趙元裕

市戶守本州助教成公濟 陳士敏 守本州助教柳起

陳士明 趙德 王亨臣 前陽州司戶嚴公佐 守

麟州助教王志臣 嚴公概 李孝忠 吳驤 李知俊

李忠寧 張永政 郝茂 李士才 李士良 申恩

宋諒 郭茂賓 栗允渙 劉元實 張懷拱 嚴公

諤 錄事林茂

管廟董吉王進均

進士李經書

進士令狐光世篆

鄉老人董握 鄉錄事李演 廟子張宣

按潞安府志五龍廟在五龍山又唐書地理志上黨縣有

五龍山太平寰宇記潞州上黨縣五龍山在縣東南二十里十六國春秋云上黨五龍山慕容永時有五龍見於此山因置五龍祠碑言上黨五龍祠舊云慕容永時有五方龍見於此山因以名山而立祠與十六國春秋說同碑以紹聖元年自春涉夏無雨禱應重修祠而立末題紹聖元年五月一日左宣德郎充潞州州學教授李夷行記左承議郎通判潞州權發遣軍州事范鉞立石李經書令狐光世篆額范鉞陳留人嘗爲壺關尉見潞安志神宗時宣德郎知太原縣見劉彭城集外制爲潞州通判見潞州府志與此碑台李復涵水集有與范鉞朝請書經光世宋進士見府志皆云潞州人通鑑長編元祐四年十一月庚午三省言舊制京朝官以上各分進士餘人自改爲寄祿官後

並一等改轉別無分別除朝議大夫以上置左右兩等改  
轉外承務郎以上至朝散朝請大夫欲依朝議大夫以上  
分左右兩等進士出身人加左字餘人加右字遷轉磨勘  
自依見行條制紹聖二年四月戊辰詔除銀青光祿正議  
朝議中散大夫存左右字餘悉罷宋史職官志承議郎在  
承務郎前七階又碑立紹聖元年宣德郎在承務郎前四  
階故皆得加左字李夷行題左宣德郎紙題左承議郎皆  
進士出身也次年爲紹聖二年則罷加左字以碑證史可  
知其確又碑陰題紹聖一年四月二十六日丁卯禱祠下  
是日申刻雨遂霽霽有左承議郎簽書昭德軍節度判官  
程易權潞州觀察支使成字潞州觀察推官尹文仲左侍  
禁潞州管界巡檢兼巡捉私茶鹽礬王植上黨縣令李惇



信司戶參軍張山上黨縣主簿韓景融上黨縣尉趙元裕  
按通鑑長編開寶九年十月甲戌昭義軍爲昭德軍宋沿  
唐制潞州有節度有觀察有刺史而以知軍州一人兼領  
其事故此碑有節度判官觀察支使推官司戶參軍等名  
李惇信潞安府志宋上黨令碑見通志金石記

太安寺額記

碑連額高四尺廣一尺六寸五分二十三行行五十字正  
書額題敕賜壽聖之寺六字分書今在芮城縣南十里太  
安村

大宋解州芮城縣太安壽聖寺額記

進士李平題額

延慶寺表白僧洪湛書

文中子以佛爲西方之聖人自漢明帝其法聿來流晉宋而

益崇涉齊梁而大盛率天下而從其教者唯唯然無異於持  
糴而蟻附矣其故何哉豈佛氏之法為能因生民甚惡欲之  
情諭之以死生禍福之事而導耶蓋其說以謂早年為孽晚  
年向佛足以消早年之孽一世積禍一日向佛足以滌一世  
之禍雖生前禍孽貫盈逮死不悟有能為之誦佛書作佛事  
猶可救護於幽冥之間而轉災為福况其常自修潔勤敬不  
倦所獲享者又可知矣若然則人豈得不從而信奉之不  
從而歸依之以求其福報者乎佛氏其亦善導於人者矣宜  
乎象教熾于天下凡大都小邑暨名山勝境靡不廣闢淨土  
開設仁祠棟宇之規□然壯麗使人因之起恭生信其有日  
齋嚴其容月給費其產敬奉僧徒依憑佛力影隨響應無有  
稍怠之心如是則有以大法之光揚□□所歸仰也茲陝服

芮城者乃西周之舊封也南去大河十里河之側曰忠孝鄉  
則有佛廟在焉前瞻荆山羣峯而岌岌左右有泉交流而泠  
泠朝而白雲飛暮而白雲歸纖埃不生衆卉昌茂實一邑之  
勝境也然寺額未立院宇荒涼瓦敗木朽無以待苾芻之流  
豈不惜哉治平四年春正月應諸處無名額寺院僧人修蓋  
及三十間者准勅存函仍得陳乞其額是時茲院弗葺幾為  
廢地矣其年中有浮屠自懷者遊禮至此愛而不能去曰真  
吾徒所樂之地也吾居之以老斯足矣頓倦飛錫之遊因念  
二梵之相遇此 盛時力圖名額於是施方便之力開善  
誘之門悉心募衆以崇修建之功時得里中好佛之士儀成  
張延義陳懷保李繼明輩四人相率民錢崇揭土木復於舊  
址因而屋之摠三十餘間不日而成以熙寧二年狀申而請

命焉至次歲三月有 詔以壽聖名其院自懷聿以住持志  
於完葺故能黜衣貶食悉用於佛使人傾信而悅助之雖其  
地褊狹難廣修營而制作之間亦可小觀焉立寢廬誦堂重  
門客次齋庖之房栖徒之舍咸以加新各有其序峻宇迴合  
軒窓洞開于以見釋門之大壯而足以瞻衡於俗也雖其力  
皆出茲圃人然篤行自信唱事而不倦者自懷之志也自懷  
之來居至於此三十年矣世姓樊氏李桑泉人也受業本縣  
彰教院乃惠勤大師之徒弟也丙子歲季春月師水子文以  
叙其事予不獲已而為之記噫予自幼從學於儒逮今行年  
四十有二進不能成致君澤民之業退不能樂道誦習以盛  
集衣冠之衆相與尊崇吾宣聖之教反覩此徒良有愧焉

紹聖三年六月十五日安昌進士劉覺記

芮城縣尉兼主簿事耿壽康

左班殿直新差管勾在京城東廂煙火賊盜公事權監芮城縣酒稅牝亢

宣德郎知解州芮城縣事薛昌國

河中府臨晉縣彰教藥師院住持講經律論傳戒賜紫沙門惠勤 修造功德主僧住持 沙門自懷立石 勾當小師講經賜紫沙門智口

蒲人焦元亨刻

按是碑作記者為安昌進士劉覺題額者為進士李本書石者為僧洪湛刻石者則蒲人焦元亨也據金石記及縣志云太安壽聖寺在城南十里太安村宋紹聖三年進士劉覺記云陝府芮城南去大河十里曰忠孝鄉舊有寺治

平四年詔諸寺無額者院僧修蓋及三十間准勅存留仍得陳乞寺額僧自懷姓樊氏桑泉人也遊居於此修蓋如式熙甯三年詔名壽聖卽據此碑文而撮舉其要耳所謂陝府芮城者宋史地理志陝州屬縣七五曰芮城隸永興軍路陝西六路永興軍府其首故記云爾又職官志云國朝武選自內殿承制至三班借職爲使臣元豐未及更政和二年乃詔易以新名耶凡十階左班殿直爲成忠郎茲記作於紹聖三年爾時尚未更制故仍書舊階薛昌國縣志職官有其名在楮端閣沐之次又見薛侏棲巖寺題名又按碑云河之側曰忠孝鄉新唐書地理志陝州府十五有忠孝之名以此碑合唐太公祠碑考之知忠孝府置芮城境無疑碑見寰宇訪碑記通志金石記

玉兔寺鐘樓記

碑高一尺八寸廣二尺十行行三十一字至三十三字不等題名十七行今在澤山縣

玉兔寺重脩鍾樓記

按大唐聖曆元年建寺於此逮今數百歲矣殿堂廊序已復脩完

聖像供具已復嚴飾而弊未新者惟餘鍾樓也

皇宋紹聖三年歲次丙子八月丁酉朔十五日壬申寺主隆師特啓至誠因故之時爲新既大且壯矣於是善友悅施衛望王永智王永誠等共造勝緣粥材於重脩力於衆費錢壹拾五萬不日而成則僕聞之感化其能是若乎蓋鍾之聲鏗聖賢聞而會焉晨昏考之俾生者知所敬仰死喪叩之使逝者脫諸疾苦是能轉禍爲福之功也僕嘗假館茲寺素服師

之高行朝夕講誦莫非

聖人之法言而樓之落成也囑僕以為記則僕雖不能於文  
豈敢固辭因書其歲月用嘉諸善事云耳仲冬望日黎陽衛  
京記

具列施主姓名于後 故縣施主李信翟氏 王永安

王永義 嚴崇 王守忠嫡母柴氏 王守信 王守舒

父王永德 藥院王號 梁德元 王閏 郭下 呂元

福 相里氏夫王嚴 前戶稅邢恕高遇段氏 劉氏

趙成村 宋相 姚岳 高村 蓋世清 蓋寶 蓋誼

父道寧母閻氏 忠村 杜俊 楊福 郭勵 郭寧

王德 郭万 大衛村 王璠 段庭廣 衛文簡 王

文寶 張普 王謙 孔文 王元德 王穆 張氏



西王村 張文 程村 程志誠 程文聚 程義 徐  
村 徐宣邢氏 梁村 梁奉元吳氏 王聚 王顯  
程翼 梁元恭 梁居政 梁真王氏 鄭宗父鄭進  
小郭村 梁懷寶父梁璘郭氏 梁義 梁聚父梁誠高  
氏 孫遇 孫利父孫維柴氏 鄭村 鄭干 鄭元徐  
氏 趙莊 張筠 李昇 張村 邢璘 邢信 張安  
王氏 高濟之 賈莊村 劉澗 劉文 上董村  
陳寶 王遂 董曹村 衛全 左村 姚璘 姚望  
姚聚 左術 賈斌 左諫 張氏 保上村 楊給元  
父楊安母呂氏 楊臻 浮谷村 梁宗 平寧村 □  
故李元

紹聖三年歲次丙子十月己亥朔十五日辛未脩造住持

沙門義隆立石 助緣師弟口義宗 法汝師姓僧崇因

小師崇真

縣尉閻詰

主簿王綬

山南東道節度推官知晉州神山縣令黃汝翼 馬清習

刊字

按玉兔寺已見周顯德五年玉兔寺羅漢遺囑碑建隆三年玉兔寺實錄惟碑言大唐聖歷元年建寺者與各碑云長安二年奏改觀爲寺者異碑云宋紹聖三年重修鐘樓黎陽衛京撰記後具列施主姓名所列村名足爲考浮山地志者之助末題山南東道推官知晉州神山縣令黃汝翼按宋元豐改官制以階易官而不及幕職政和始改之

今記作於紹聖故猶以幕職入銜施主姓名內有邢恕疑與御史中丞邢恕別為一人碑見通志金石記

福嚴院王元等題名

碑高二尺廣三尺十二行行七字字徑一寸正書今在鳳臺縣

郡將王元率倖車崔順孫判官鞏瑗晉城令耿敏司理李祐前隰州司理張闋晉城尉黃叔敖州學正陳珣同遊福嚴繼至青蓮蕭散終日迺還紹聖丙子十月廿八日題

男穀穀崔鼎侍行

硤石山青蓮寺住持沙門僧洪秘立石此郡守王元率屬游福嚴院題名崔順孫縣志謂其官為同知攷宋志有通判軍州事掌倖二郡政初無同知之名曾鞏通判越州東坡作詩送之蘇集標目為送曾子固倖

越據此通判之得稱倅車由來舊矣縣志蓋誤黃叔敖續  
宋詩紀事小傳叔敖字嗣深分甯人廉之季子元祐進士  
乙科累官廣東轉運判官徙荆湖北路廉訪使紹興初除  
給事中以左中大夫充徽猷閣待制提舉臨安府洞霄宮  
歷戶部侍郎進尚書所著有文集奏議二十卷春秋講議  
三卷餘人無攷丙子爲紹聖三年碑見通志金石記

琵琶泓題名

碑高一尺一寸二分廣一尺四寸五分十  
行行八字正書今在鳳臺縣城天慶觀

郡守王元舜弼倅車崔順孫毅夫再逝崆峒觀琵琶泓前隰  
守劉程公範同至巡警馬誠之慎思郡幕劉行之行中民掾  
陳諤昌武法掾鄭珣君瑞邑尉黃叔敖嗣深從紹聖丁丑歲  
乙巳月丁亥日舜弼題

按縣志吳神山再南曰小崆峒山亦曰洞子崖有琵琶寺  
爲唐宋人盛游之地微迤西曰琵琶泓澄灣納溜激射成  
雷峭壁迴景周流如畫宋人題石壁曰清風壁南微東距  
縣十五里碑所云再游崆峒觀琵琶泓者卽指此地言晉  
城山水佳境頗多琵琶泓蓋其最勝者今據此碑郡守通  
判率屬同游一再踵至志言爲唐宋人盛游之地信不誣  
矣宋職官志州設知軍州事一人通判一人外有司戶司  
法幕職巡警等官記所謂倅車者通判巡警者捕盜巡檢  
官郡幕者幕職官掌裨贊郡政總理諸案文移其民掾法  
掾則戶曹法曹各參軍爲今之經歷縣尉則今典史也馬  
誠之劉行之陳諤鄭珣縣志職官皆有其名崔順孫黃叔  
敖見前丁丑爲紹聖五年碑見通志金石記

新亭雙菡萏碑

碑高四尺六寸八分廣一尺六寸五分二釐上載畫雙菡萏下截十九行行二十七字正書今在絳州儀門

紹聖三年四月朝請郎涪川周侯自尚書刑部郎中出守于絳其年政成境土雖遠爲一家民心雖殊爲一人上下無間言內外無異志和氣之所被物無疵癘而年穀登元符改元之月 侯所燕處新亭之池有芙蕖生焉一茄而雙菡萏吏民相與觀之咸以爲 侯政成之應朝廷其以我

侯歸矣 侯視之獨以爲不然顧而言曰

今仁聖天子在上盛德之施昭天滉泉祥光瑞氣充塞宇宙其有非人力而致者受命之神寶應時而出此萬世之一時也絕域殊俗重譯萬里山川鬼神罔不克寧洎鳥獸草木咸若則是芙蕖之祥豈太守之應哉其歸諸

天子况承上之流宣上之化實太守之事邪吏民由是知

侯之志不以政成自多而得古人歸美之義焉夫萬物在天地之間離合奇偶均於自爾造物者未嘗私其巧也而情同者以情相與氣同者以氣相求亦各惟其類焉波草木有生而無知非有所感觸也而人之所以動之或見於至誠然則侯之爲政所以鼓舞動化者其出於至誠歟爲以不才獲預勝賞承侯之命俾記其事進不敢佞退不敢誣謹述侯之政與侯之志以示來者

元符元年六月二十六日錄事叅軍張爲記

正平縣尉李庭堅書

朝請郎知絳州軍州兼管內勸農事驍騎尉借紫周



校絳州志諸舊亭在州治內宋元符間池生並蒂蓮時淄

川周侯自尙書刑部郎中守絳錄事參軍張爲有記卽謂  
此碑文也記文云元符改元之月侯所燕處新亭之池有  
芙蓉生焉一茄而雙萼舊據宣和三年知絳州李皓所作  
潛心堂記有魏侯以漕計按屬部館郡齋新亭之文意此  
亭必絳守公廨中花木幽閒之地可以娛賓可以習靜者  
故游覽之士特多稱賞之耳長編元符元年五月丙寅詔  
以六月朔改爲元符荷花六月始開此所謂改元之月卽  
舉六月言之其實五月已降詔矣碑又云今仁聖天子在  
上盛德之施昭天漏泉祥光瑞氣充塞宇宙其非人力而  
致者受命之神寶應時而出此萬世之一時也所謂受命  
神寶卽段義所獻之古玉記後名爲傳國寶者今攷長編  
元符三年五月丙寅禮部言永興軍咸陽縣民得古玉記



望委官詳求典故三月乙丑三省言翰林學士承旨蔡京等奏奉敕講議定驗咸陽縣民段義所獻玉璽其文曰受命於天既壽永昌黜諸家偽說而斷以正史考驗甚明委是漢以前傳國之寶法物禮儀乞所屬施行詔令禮部太常寺考按故事詳定以聞五月戊申朔上御大慶殿受傳國寶行朝會禮癸丑以受寶畢恭謝景靈宮庚申詔獻寶人段義爲右班殿直仍賜絹二百匹據此知京卞於哲宗朝已敗符瑞之說異時徽宗崇尚道錄馴至傾亡其端實開於此玉璽有受命於天文故此碑及之周侯不得其名宋刑部郎中二人分左右廳掌詳覆敘雪之事見文獻通考

石柱題記

石高一尺八寸廣七寸六分四行行  
十一二字不等行書今在鳳臺縣

元符戊寅十月十日高平郡別乘河南段約同晉城令耿敏  
尉黃叔敖因按田自琵琶泓至青蓮寺登擲筆臺步月臨流  
傳觴賦詩明日去宿景德寺

按縣志青蓮寺在城東南三十五里峽石山隋惠遠說法  
道場宋賜名福巖院寺有擲筆臺僧惠遠注涅槃經成擲  
筆處景德寺在城東高都鎮舊志曰唐建舊名慈善內有  
宋牒又云峽石山兩岸急束中通石徑由高趨下天光一  
綫至別有天路轉峯回建青蓮寺有擲筆臺款月亭諸勝  
今碑所載各地與志悉合又據縣志藝文類金楊庭秀撰  
福巖院記有云峽石山青蓮寺爲河東盛概兼之院被當  
時賜額尤稱名境叔敖瀏覽其地記之而去殆亦有風趣

者歟耿敏爲晉城令縣志職官有其名戊寅元符元年

勅封明靈公牒

碑連額高四尺一寸廣二尺九分九行行二十字行書申  
文四行行五十四字正書額題六字篆書今在臨縣南七  
十里郝家塔

尚書省牒

禮部申准都省送下端明殿學士中大夫河東經略安撫  
使知太原府林希劄子奏近嵐石麟府兩路王師進築堡  
寨凡所過神祠並令致祭今據統制官王文振等申石州  
明靈侯祐助王師皆有應驗不敢一一縷陳契勘明靈侯  
世傳趙氏元豐四年帥臣孫永奏為祈禱有應

先朝封號明靈侯經今二十年本路前後出師必有冥助今  
來王師進築靈應尤異伏望

聖慈加封爵號庶使鬼神効職者亦被褒錄

牒奉

勅石州明靈侯王師濟河問罪西夏元戎慎舉有祈于侯正直聰明惟順是助晉寧建壘遂合新秦我陵我阿民樂耕牧底茲勝績寶靈之休進封貴公秩冠五等永福并土尚其格思可特封明靈公牒至准  
勅改牒

元符二年十月 日牒

右正議大夫守左丞蔡

押

金紫光祿大夫守左僕射

押

按碑刻尙書省牒禮部申准都省送下端明殿學士中大夫河東經略安撫使知太原府林希劄子奏近嵐石麟府

兩路王師凡所過神祠並令致祭今據統制官王文振等  
申石州明靈侯祐助王師皆有應驗云云按通鑑長編拾  
補咸淳臨安志希以元符二年二月甲子自杭知太原太  
原府宋制例兼河東經略安撫使乾道臨安志元符元年  
九月己酉中大夫林希知杭宋史林希傳擢同知樞密院  
罷知毫移杭旋以端明殿學士知太原府徽宗立徙大名  
與碑端明殿學士中大夫合王文振見宋史本紀紹聖四  
年正月甲午有涇原鈐轄王文振卽其人又碑云元豐四  
年帥臣孫承奏爲祈應云云按孫承以元豐元年十一月  
自軍器監知太原三年秋罷見蘇魏公集資政孫公碑又  
是年七月知瀛州王克臣知太原代承牒云四年當在承  
未去任時

克臣知太原  
原見長編

碑末云特封明靈公牒至准勅故牒

元符二年十月日牒右正議大夫守左丞蔡金紫光祿大  
夫守左僕射宋史宰輔表紹聖四年閏月壬寅蔡卞除尚  
書左丞元符三年五月知江甯紹聖元年四月壬戌章惇守尚書左  
僕射兼門下侍郎元符三年九月知越州此碑左丞左僕射卽蔡卞  
章惇也長編元符二年五月乙丑左正議大夫章惇爲金  
紫光祿大夫大中大夫蔡卞爲右正議大夫以諸路進築  
畢功也階與此合碑見通志金石記

明靈公廟碑

碑高三尺七寸廣二尺三分二十  
一行行三十八字正書今在臨縣

靈公廟碑

朝奉郎權通判晉寧軍事梅昌符撰并書

皇城使知晉寧軍事張世永篆額

石州西北瓊山祠之神能以言語與人接叩之無不□委曲  
詳盡善道人腹中意言人福禍若符契之合水旱請禱悉蒙  
其惠有悖慢于庭者不病即死四方之人奔走祠事不敢懈  
而姓氏不著初不知其果何神也 公嘗自言諱瑩趙其姓  
然後知 公在晉高祖時為同中書門下平章事累拜中書  
令出為晉昌軍節度使事見五代史中熙寧七□端明殿學  
士孫公守并聞 公之靈亦異矣請于 朝封為明靈侯載  
在祀典廣廟貌而新之元符二年七月樞密林公帥太原以  
麟府豐三州在大河之外限以西賊孫遠阻絕不能與嵐石  
通□為邊患議築四砦以相往來 朝廷許之於是合南路  
之兵數十萬鳩工動衆深入虜地林公禱□ 公曰使兵出  
役就無警急之憂願 公陰為之相 公曰然不日告成卒

以無患而兩路由此□矣林公表其事而上之加封明靈公  
焉 公為晉名臣勸高祖毋反可謂事上忠行己直其生也  
□詭隨其死也又能以禍福警動於人血食不衰其遺靈餘  
烈望之莫不悚然五代之晉迄今百有□年 公之沒固已  
久矣未有顯稱□號之錫寔自本朝蓋潛德幽光待熙盛之  
亘而後發也 公未封嚴威不可犯及其增封而益務寬厚  
嘗語其廟巫曰吾將罕與人言矣豈名隆位尊而能若是乎  
予聞之人道在明鬼神處幽宜其相遠而兩不相接也漢武  
帝時神君能言非可得見聞其音與人言時去時來來則風  
肅然也予以為殆妄誕不可考及觀 公之事可信不疑而  
又能福庇斯人回叙 公出處卒末以遺後世銘曰

峨峨瑣山

矯矯楹丹

維神□□

接人以言

運逢天



宋 爵為公重 袞服赤舄 荅神之寵 以稼以穡 不  
乾不溢 垂千萬年 厥祀無斁

建中靖國元年七月日

石州定胡縣尉兼主簿事龐康孫立石

知石州定胡縣事楊天祐

校碑題朝奉郎權通判晉甯軍事梅昌符撰并書皇城使  
知晉甯軍事張世永篆額通鑑長編元符元年八月甲午

樞密院言河東路經略使司林希奏建葭蘆為軍乞賜美

名以彰元豐之盛烈詔葭蘆特建為晉甯軍

詔以知軍為  
嵐石路沿邊

安撫使兼嵐石隰州都巡檢知軍以下  
聽經略使奏舉一次置通判等六員

碑立建中靖國元

年在元符置軍後故得有晉甯通判長編元符二年正月

庚申河東路經略司言統制官張世永折克行遣準備勾

當大頡人馬出界逢賊鬪敵藏才山下斬首千餘級六月  
丁酉河東路經略司言近據太原路鈴轄張世永等探聞  
西界賊馬屯聚掩殺得功人乞推恩卽此碑之張世永皇  
城使武階宋邊郡例以武臣爲守故世永得知晉甯碑云  
石州西北山祠之神自言諱瑩趙其姓五代史記趙瑩字  
元暉華州華陰人晉高祖卽位拜翰林學士戶部侍郎同  
中書門下平章事累拜中書令出爲晉昌節度使開封尹  
與碑合其曰熙甯七端明殿學士孫公守并請封明靈  
侯臨縣志宋將西征請應克捷碑記作見元符二年十月  
進封明靈公縣志其曰元符二年七月樞密林公  
帥太原按希自同知樞密院事出知者長編元符二年正  
月甲子中大夫林希充端明殿學士知太原八月乙未端

與嵐石通

關

爲邊患議築四砦以相往來朝廷許之於是

林校長編注

甯河寨卽碑所謂四岩也

末題建中靖國元年七月日

石州定胡縣尉兼主簿事龐康孫立石知石州定胡縣事

楊天祐按康孫宋宰相龐籍諸孫又碑云熙甯七關端明

孫公守并云云以長編宋史諸書考之熙甯年守太原者

為王素馮京呂公弼三年七月至四年七月劉庠四年七月至七年九月郭遼

七年九月至九年二月韓絳九年二月至元豐元年八月無孫永永於元豐元年

知太原碑疑誤

郭瓘題名

碑高七寸廣六寸三行行六字字徑五分正書左行今在

嘉陽郭瓘恂達

過此崇寧元年

壬午夏五月廿四日

李長者象

碑連額高二尺二寸廣一尺三寸上象下記二十七行行  
二十字字徑三分正書額題華嚴論主顯教妙嚴長者十

字今在  
壽陽縣

唐李長者皇枝也諱通玄但言滄州人開元七年至太原蓋  
縣大賢村有高山奴延納安居長者每旦唯食棗十顆柏菜  
餅子如匕大者一枚自尔不交外人掩室獨處含毫臨紙曾  
無虛時如是三稔一旦捨山奴南去至馬家古佛堂自搆土  
室寓於其側端居冥默于茲十年後復褰挈經書遵道而去  
次冠蓋村忽逢一虎馴伏長者告之吾欲著論釋華嚴經可  
與吾擇一栖止處言畢虎起長者徐而撫之遂將所挈經囊  
掛于虎背於是虎望神福山原直上二十餘里當一山龕收  
囊於內龕之四旁舊無泉澗長者始來之夕風雷暴作拔去  
一松化為一潭僊陽之歲祈求必應長者製論之夕心窮玄

奧口出白光以代燈燭居山之後忽有二女子容華絕世皆可笄年俱服布衣悉以白巾幪首姓氏居處一無所言汲水焚香供給淨饌莫知所以慙于五祀著論將終遂尔絕跡長者身長七赤二廣眉明目丹唇紫肥長鬚美茂脩臂圓直髮彩紺色毛端右旋殊妙之相靡不具足首冠樺皮身披麻衣長裙博袖散腰而行居常跣足放曠人天忽一日出山訪舊止之里適值墅人聚族合樂長者曰汝等好住吾將欲歸衆乃必謂却還滄州揮涕懇留長者曰縱在百年會當歸去於是衆送長者却還龕所復衆曰去住常然汝等可各還家翌日長叟結徒礼候但見姿容端儼已坐化於龕中報齡九十有六時當三月二十八日也

大宋崇寧元年七月十五日

比

宗勝

立石

施石王正助緣蘭宣楊誠 楊世榮 楊世明 趙永超  
勸緣太原府壽陽縣方山昭化院住持沙門法政王崇隱  
刊

此唐李長者行蹟記兩截刻上摹長者象口吐白光二道  
後有一虎下記行蹟不題撰書人名氏而書法娟妙宋人  
小楷之可法者碑在方山卽記中之神福山通志未著錄  
碑見金石續編

### 思堂記

碑連額高四尺二寸二分廣一尺六寸八分十六行行  
三十八字額題思堂之記四字均正書今在絳州儀門

### 思堂之記

絳在晉地最為奧區漢魏周隋間易置郡縣曾無定制絳但  
嘗易治所而為州則未嘗廢也唐□□中則總管潞澤虞芮

等十五州之治其原隰平行其川澤寬長其民物繁庶所領之縣□主客丁黃□萬夏秋稅租倍之去王畿不遠千里為守者常難其人

汴都時君子莊之為守也知其如此遂於治舍之西偏因其棟宇之完而增飾之聽訟之餘必默坐焉名之曰思堂□謂凡見於事皆不可以不思也思古之人則有若陸凱韋世康盧元輔李憲或以課最聞或以理行稱吾則思有以望其絕塵之蹤而躡其後也思今之人則凡守之善惡能否郡之士民往往多能言之吾則思有以防如川之口而弭其謗也於是治身則思廉臨民則思惠奉法則思公蒞事則思勤待同僚則思誠待屬僚則思恭雖寤食之頃不敢忘也予聞其言而喜之曰豈獨能効一官者所當然哉凡人所以欲寡其過



而未能者未之思爾苟能思之何所不至然事未至而思之則無名事既往而思之則無及要在適當而已夫知思之為益而不知思之為損則其害愈大洪範以五事配五行思則土也土之為物水得之濁則思有害於精火得之熄則思有害於神適其當者猶不可不知此又況營營於轉徙之途與接為構而夜氣不足以自存者乎是以掘苗者非不思長也刻楮者非不思巧也捕蟬者非不思得也搏虎者非不思勇也然其利害已較然矣思之得與不思之失不思之得與思之失亦在乎擇術如何耳以

子莊之熟於政事其治一郡固有余力今乃加慎不已異時政成當無愧於陸韋盧李予既書其命名之意因明思不思之義以自警云

崇寧二年三月望日閩郡徐常記

魯人梁寅祖書并題額

王立刊

按絳州志思堂在州治東宋朝散大夫絳州軍州事時恪  
建舊志閩郡徐常記通志張繹作記卽此碑今搨本未有  
崇寧二年三月望日閩郡徐常記魯人梁寅祖書無張繹  
名當從搨本爲正碑有云唐闕中則總管潞澤虞芮等十

五州之治舊唐書地理志絳州隋絳郡武德元年置絳州  
總管府管潞蓋建澤沁韓晉呂澹泰蒲虞芮等十五州  
然則碑所闕文爲武德字又有云陸凱韋世康盧元輔李  
憲或以課最聞或以理行稱按陸凱魏獻文時正平郡太  
守以良吏稱世康隋開皇初絳州刺史在任有惠政奏課

最盧元輔唐貞元絳州刺史課最李憲晟子歷遷絳州刺史河中兵本仰食於絳而汾可輸河渭歲租與羅常數十萬石憲濱汾相地治新倉當費二百萬請留垣縣粟羅河南以錢還羅絳粟既免負戴勞又權其贏以完新倉絳人利賴之終嶺南節度使諡曰武並具諸史本傳此數人皆治絳有聲者碑引之欲時君之繼美陸韋諸人云子莊者恪之字碑又云丁黃闕萬夏秋稅倍之宋史地理志絳州崇甯戶五萬九千九百三口九萬四千二百三云稅倍之然則稅當二十萬碑云民物繁庶者信不虛矣通鑑長編拾補崇甯元年五月乙亥朝奉大夫提舉河東常平徐常送吏部與合入差遣以此碑知爲閩人碑見通志金石記

昭化禪院帖

碑高一尺三寸廣二尺一寸二十五  
行行二十六字正書今在壽陽縣

太原府

帖壽陽縣方山昭化禪院

准 尚書禮部符准崇寧二年八月三日

勅中書省檢會崇寧二年四月二十一日

赦書應先聖

賢祠宇舊來有名德僧道為衆師法未有封賜爵秩謚号師  
名廟額仰所屬勘會聞奏特加封賜今勘會下項八月二日  
三省同奉

聖旨摩騰賜號啟道圓通大法師法蘭賜號開教摠持大法  
師傅大士賜號等空紹覺大士李長者賜號顯教妙嚴長者  
定應大師賜號定光圓應大師其婺州雙林寺并太原府壽  
陽縣方山昭化禪院西京白馬寺汀州武平縣南安巖均慶  
禪院今後每遇

聖節各許進奉功德疏內雙林寺回賜度牒二道餘三處各一道奉勅如右牒到奉行前批合入祠部格八月四日午時付禮部施行仍開合屬去處數內一項須至符下太原府壽陽縣方山昭化禪院係李長者造華嚴台論之所

司功

勘同

于分王俊押  
元慶押

馬宣押

張溫押

郝明押  
年

押

孔目官楊志押  
李

押

司官韓元押

司押官

郝年

右帖壽陽縣方山昭化禪院仰詳上項尚書禮部符內

勅命指揮施行

崇寧貳年九月初三日帖

權河東節度推官石

差土

權太原府觀察判官鄭

押

宣義郎監在府稅務權節推張

押

承事郎簽書河東節度判官廳事王押

朝散郎通判太原軍府事蔡差

朝奉大夫通判太原軍府事陳押

龍圖閣學士朝奉大夫知太原軍府事范押

皇兄河東山南西道節度使守太師開府儀同三司太原

牧兼興原牧陳王在京

將仕郎縣尉劉

將仕郎主簿張

通直郎知縣事負

方山昭化禪院供養主比釋口勝 監院比釋宗悟 住

持沙門法政立石張端李震李圀馮 李口口口口口口

口 施石

校金石續編載有此牒文式悉同郝明彼無明字押官祁  
年彼押上有句字俊智彼作侯智微不同耳壽陽縣志方  
山寺在方山有上寺下寺爲唐李長者通元建元祐三年  
張商英訪遺像立古殿三間長者堂三間邑人改建集賢  
嶺下名昭化院爲下寺此昭化之名所由來也又志載崇  
甯三年勅賜顯教妙嚴長者碑蓋卽指此續編引潛研堂  
跋尾陳王蓋徽宗之兄佖封申王者宋時諸王外戚領節  
度使者不之鎮而府帖獨存其銜此一代典故見於石刻  
攷官制者所宜知也今攷長編元符三年正月丙戌時徽宗卽  
位皇兄申王佖進封陳王宋史本紀崇甯二年五月癸巳  
以陳王佖爲太師東都事略吳王佖傳徽宗立加太傅太  
尉拜太師徙鎮河東山南西道宋制領河東節者必兼太

原牧領山南西道者必兼興元牧此帖以崇甯二年九月初三日行下時必已於五月拜太師故帖上得具此銜又帖書龍圖閣學士朝奉大夫知太原軍府事范抑攷徽宗卽位之初帥太原者有范純粹曾肇兩人純粹於建中靖國元年已移知延安府見宋史職官志曾肇有到應天府謝表詳文意除太原後並未履任長編拾補崇甯元年九月辛巳知揚州呂惠卿知太原府十月改大名代之者史不能詳今碑爲崇甯二年九月所立有知軍府范某銜細檢史籍知爲范鏜無疑矣長編元符二年十月己酉朝散郎知蘄州范鏜特復龍圖閣待制知青州十二月壬寅章惇欲以孫覽帥慶曾布曰范鏜可否眾默然布曰以鏜易覽何如

時覽帥蘄

蔡卞曰如此卽不妨拾補元符三年三月辛



未給事中范鎰爲龍圖閣待制知瀛州初議進呈鎰除目  
章惇曰蹇序辰亦可用布曰鎰乃昔會議帥若不面議定  
必上前紛紜惇曰善及進呈上曰鎰亦知邊事眾唯唯而  
已乙酉翌日布再對上諭布曰蔡京張商英范鎰皆已去  
只有安惇王祖道未去布曰言者稍舉職則此輩亦何可  
安也九月甲申鎰坐惇卞黨由朝奉大夫龍圖閣待制知  
瀛州落職知滁州建中靖國元年十二月壬寅鎰以朝奉  
大夫知滁州復集賢院修撰知澶州校鎰本黨於京卞初  
用是斥後徽宗用鄧洵武說召用熙豐舊人鎰遂復職崇  
甯元年蔡京入相盡反曾布所爲樹立私黨太原爲北邊  
重鎮非數典大州者不得除授鎰故歷瀛青二帥且徽宗  
素有鎰知邊事之語度其時京必陰爲道地因得由澶移

典大藩鏜本龍圖閣待制貼職已崇

宋神哲朝帥太原者必加職龍圖閣學士

如曾布孫

就加學士不爲踰越所帶階官朝奉大夫與碑

實皆是  
銜亦適相符夷攷其時廷臣范姓除鏜外實無別具階望  
堪作晉帥者謹以碑史相證定知太原軍府者此范姓實  
爲范鏜碑之有助於史良非淺矣文獻通攷宋有兩使節  
觀察防團軍事推判官選人則爲判官京官則爲簽判掌碑  
贊郡政政和初改簽書判官廳公事爲司錄建炎初復舊  
此崇甯二年帖尙未改制耳碑見寰宇訪碑錄碑題知縣  
事員不著其名以游昭化院詩考之卽員逢原也

### 重新堯廟像記

碑高四尺四寸五分廣二尺六分十五行  
行三十六字正書今在浮山縣東八里

### 晉州神山縣重新堯廟像記

山右王公集卷十六  
將仕郎襄陵縣丞李挺方撰并書

通仕郎監汾州永利西監權神山縣主簿申蟠篆額

縣之東距山十餘里有堯廟焉其始作者與其歲月皆不可考而知也歲在辛巳冬十有一月祥符張君涖縣之初因與其寮並歎堯祠顧瞻而歎曰堂宇之庫狹固已陋矣而其貌尤甚焉虬髯怒目危冠大帶是豈象聖人而居之蓋野人之所為也遂欲作而新之未遑也後二年縣之民順君之政君為政亦不鄙夷其民民思有以稱君意遂相率造庭咸告曰堯之廟荒蕪不治堂宇將傾不以此時更而新之恐無以久歲月堯之象衣冠不正形容靡所咨訂不以此時問君考制度焉恐無以貽後人君喜其民之順不欲拂其情遂俾興葺逾月之間荒蕪既除堂宇加飾衣冠既正容貌從新稽諸制

度咸有法則遂謂其僚李挺方曰此可以示邑民子為我書  
之子遂書曰堯之德至矣千萬世之後莫不知戴之不知其  
所以然豈獨區區此邦之人廟而祝之為足傳也蓋平陽堯  
故都也縣居平陽之東因其故都祀者加多焉昔晉人歌於  
詩謂其地本於唐而有堯之遺風豈其近聖人之居然乎今  
此邦之人廟而祀之亦謂是乎孔子曰大哉堯之為君惟天  
為大惟堯則之蕩蕩乎民無能名焉彼嗤嗤之氓安知帝力  
哉此所以徙廟而祀之也若乃君之志則異於是閔此邦之  
人其俗陋矣故存其廟貌庶幾乎遺風不泯俾斯邑之民欲  
其及時以禮自虞樂也則君之治可謂知本矣予故樂為之  
書

崇寧三年夏五月朔邯鄲李挺方書

通仕郎晉州神山縣令張傲

將仕郎主簿王悅

從仕郎縣尉馬持

延安府表佐摸勒

縣人馬時楊義邢遇一鐫

按碑廟像爲通仕郎晉州神山縣令張傲重修撰記并書者爲將仕郎襄陵縣丞李挺方篆額者爲通仕郎監汾州永利西監權神山縣主簿申蟠摸勒者爲延安府人袁佐鐫石者則縣人馬時及楊義邢遇一也據金石記云挺方邯鄲人時爲縣丞碑字畫道美刻工亦精然則挺方蓋必當時善書者宋史地理志汾州西河縣有永利西監平陽府隸河東路本晉州襄陵神山皆所屬也職官志通仕郎

舊爲錄事參軍縣令崇甯時換政和再換從政郎將仕郎  
舊爲軍巡判官司理司法司戶主簿尉崇甯時換政和再  
換迪功郎從仕郎舊爲防團推官監判官又續通鑑崇甯  
二年九月辛丑改吏部選人七階曰承直郎儒林郎文林  
郎從政郎通仕郎登仕郎將仕郎從刑部尙書鄧洵武言  
也舊制以職爲階官而以差遣爲職名實混淆元豐雖定  
官制此猶未次故更名以革其弊據此選人之置七階實  
洵武創議茲記作於崇甯三年五月正值更制之初故階  
銜一一備列乃不數年輒又易其名北宋之季政令紛更  
此亦其一端也碑見通志金石記

重刻唐李靖獻西嶽書

石高一尺七寸廣二尺四寸五分二十三行  
行十九字至二十一字不等今在潞城縣

唐李衛公獻西嶽書

布衣李靖不撓狂簡獻書 西岳大王閣下靖聞上清下濁  
爰分天地之儀晝明夜昏乃著人神之道又聞聰明正直依  
人而行至誠感神信不虛矣伏惟

大王嵯峨擅德肅爽凝威為靈術制百神配位名雄四岳是

以應像清廟作鎮金方遐觀

歷代

括王莫不順時裡祀興雲

致雨天寶

肖從轉

孽為祥何有不賴嗚呼靖者一丈夫爾何

得進不偶用退不獲安呼吸若窮池之魚進退似失林之鳥

憂傷之心不能已已社稷凌遲宇宙傾覆奸雄競逐郡縣大

崩遂欲建義橫行雲飛電掃

斬鯨鯢

而清海岳卷氛侵以闢

山河使萬

姓昭

蘇庶物昌運即應天順時之作也又大寶不

可以望據欬杖劍竭節未有飛龍在天捧忠義之心身傾濟

世志吐肝膽於階下惟 神鑒之願告進退之機得遂平生之志有 賽德之時終陳擊鼓若三問不對亦何神之有靈然後即靖斬大王頭焚其廟建縱橫之略亦未晚也惟神裁之

唐李衛公布衣日獻西嶽誓今摹刻于石己亥仲春

崇甯三年五月十五日漳川楊大中命工摹諸石

維那 張誠 翟永海 李良 李清 申興 李立

李善 張真 翟善 胡宗 武□ 常進 申言 常

定 翟□

嘉靖三十一年八月之吉潞城縣知縣馬追重立

按此書見廣川書跋弇州山人續稿而石墨鐫華暨金石萃編皆斷爲僞作此碑据後題於崇甯三年五月碑末又



有嘉靖三十一年八月之吉潞城縣知縣馬追重立文則  
爲明重刻潞城志明知縣馬追陝西同州貢生卽其人志  
無知潞城年以碑考之知爲是年任又石墨鐫華錄此碑  
有二一在潞安府當卽此碑

雪中游昭化院碑

碑高一尺一寸廣二尺四寸二十  
二行行十五字行書今在壽陽縣

雪中游昭化院謁

唐李華嚴新賜号顯教妙嚴長者祠時雲靄蔽山不遂眺  
望特松雪可愛留二詩于壁

邑宰華陰負逢原

一宿方山寺蕭然碧嶂環由來愛松雪終不厭雲山亂石風

泉響疎燈夜磬閑 如何有 羈絆未許謝人寰

右一

招提隱

層

岑細

路

多曲折况茲節寒行石棧凍欲裂平生愛

林藪

不惜

犯霜雪萬松變瓊姿點綴殊未歇巒岫皓氤氲殿

閣富皎潔濁醪屢濡脣安得暫頽頽伊昔有異人卜居此崑

崑

亢靈跡燦可考未易遽泯滅美女不為魔猛虎亦自竭遺骨

蛻金環著論翼貝葉比緣守臣章天子念往哲恩渾賁

聖衍

賜号良炳燧邑令何與焉焚炷一頂謁永言垂無窮鬱興山

茂葉

右二

癸未十一月上休日資深顯

崇寧三年十二月十五日方山昭化禪院住持沙門法□

立石

校碑題雪中游昭化院謁唐李華嚴新賜號顯教妙嚴長者祠時雲霧蔽山不遂眺望特松雪可愛留二詩於壁邑宰華陰員逢原校壽陽縣志昭化院卽下寺寺門古柏二內有崇甯三年宋邑宰員逢原游昭化院詩今搨本多漫漶壽陽志具載二詩今据補志間有與碑異者如細路作徑路况茲作况此蛻金作旣金今仍以碑爲正又縣志宋知縣員逢原華陰人崇甯間任亦見平定州志碑立崇甯三年十二月

惠應廟牒

石二截高二尺五寸廣一尺八寸上截八行下截六行行字不等行書今在屯留縣北三里龍潭上

尚書省牒潞州屯留縣惠應廟

禮部狀承都省批送下河東轉運司奏潞州申屯留縣古

張厚泉龍潭祈禱響應乞加爵號事尋下太常寺勘當據  
本寺由檢准本寺令節文諸神祠應旌封者先賜額合取  
自朝廷指揮

牒奉

勅宜賜惠應廟為額牒至准

勅故牒

崇寧四年二月 日牒

中大夫守右丞鄧

押

太中大夫守左丞何

押

司空左僕射

押

按金石記引潞安府志載宋尙書省牒潞州屯留縣惠應  
廟文與今碑文語式悉合惟文中奉勅宣賜一語今碑作

奉勅宜賜宜宜二字相似故致訛誤然宋時公牘用宜字爲文者甚夥仍當從碑文作宜字爲是金石記又云所謂右丞鄧者鄧洵武左丞何者何執中司空左僕射不著姓者蔡京也是時文武恬嬉權佞當國其君臣日從事於虛無祈禱諂黷鬼神此亦亂亡之兆也錄之見宋時文牒之制且可徵當日國是云今攷宋史宰輔表崇甯三年九月乙亥鄧洵武自刑部尙書除尙書右丞四年二月甲寅何執中自太中大夫試吏部尙書兼侍讀除尙書左丞崇甯三年五月己卯蔡京自尙書左僕射加司空大觀元年正月壬子鄧洵武自中大夫守尙書右丞除尙書左丞此牒繫銜何執中爲太中大夫左丞蔡京爲左僕射司空表碑相合惟洵武之除右丞表不言其爲中大夫此碑具書中

大夫右丞足補表闕又攷其由右丞除左丞時表舉其階  
仍爲中大夫此數年中洵武蓋未嘗遷官耳又按史表崇  
甯元年蔡京爲尙書左僕射兼中書侍郎二年京轉左僕  
射至四年三月甲辰趙挺之乃自門下侍郎進尙書右僕  
射兼中書侍郎茲牒以四年二月降爾時挺之尙未入相  
正京獨秉國鈞之日也地理志隆德府昭義軍節度本潞  
州崇甯三年陞爲府此牒以崇甯四年二月行下而尙書  
省牒文仍書潞州疑誤碑見通志金石記

福嚴淨影山場記

碑高三尺四寸五分廣二尺五分二十二行行三十字字  
徑八分額題福嚴淨影山場之記八字均正書今在鳳臺  
縣

福嚴淨影山場之記

將仕郎詳定一司勅令所刪定官場之道述書刊字王信  
曾大宋崇寧四年歲次乙酉三月一日因下院淨影寺齋會  
有住持福潤預日赴上寺請懋禪師說法師曰余自住院來  
未暇至彼今必赴焉師忻然而往到彼陞座演法開示會畢  
遊看

祖師遺跡四顧峯巒秀麗嵯峨陡峻師乃嘆曰真

聖賢依棲之地也又見古碑曝落上有山場四至隱隱而曰  
乃大隋開皇七年曇叡禪師之所立也遂錄之迴還時本寺  
營造殿閣齋廚一新功畢命匠镌石曰俟□□紀其歲月遂  
請

宣德郎知藍田縣事黃公爲文命予記其三寺山場予辭不  
已遂據懋禪師之說勒之碑陰略爲其記

一福嚴禪院山場四至

東至馬鞍屹南北隨山勢爲界

南至珽山頂西南至風門嶺東西隨山勢爲界

西至高家嶺棘針林南北隨曲尺地形爲界

北至交河水心西北至柳泉南分水嶺東西隨河嶺  
爲界

一淨影寺山場四至

東至箭豁子東南至孔楊坂南北隨山勢爲界

南至大迴溝西南至梯巖山東西隨水心爲界

西至大河南北隨河勢水心爲界

北至要子岬東西隨山勢爲界 一南閔觀音堂四

至東至廟南至街西至濠北至濠爲界



崇寧四年七月

日 住持沙門 鑒巒

淨影寺住持沙門 福潤同立

此福嚴淨影二寺山場記在鳳臺縣東南九十里蟠龍山  
崇寧乙酉三月一日青蓮寺僧鑒巒赴淨影開座說法畢  
因訪曇法師遺跡清查山場立石巒禪師即鑒巒寺又有  
政和六年巒公塔銘即其人也記云本寺營造殿閣齋廚  
請宣德郎知藍田縣事黃燦爲文命予記三寺山場勒之  
碑陰是此碑有碑陽而未拓或轉砌牆內亦未可知三寺  
者福嚴寺淨影寺觀音堂額署福嚴淨影山場記二寺有  
山場觀音堂在南關無山場也金石記載淨影寺山場碑  
落福嚴二字又云令所官王之道書校碑詳定一司勅令  
所刪定官不得稱所官又姓楊非王金石記誤

重建治平院記

碑高二尺廣四尺五寸四十六行行十八字字徑七分正書今在鳳臺縣

□□山□□院修建住□□□□□□□□北□□  
十里有谷□□□□□□□□□□實□地之所有寺□  
□□□□□□□□□□碑□□大像存焉□□□□□  
□□□□名□□□□有□□□□□□□□□□奉  
□妣女殷氏□□□□□□□□□□以興多厯□□立  
學之舌□□□□起□□□□□□因從開元□□□院焉方是之  
時寺□住此□□像篆(玄迄周廣順間五臺真容院□□龍  
飛□伏錫□聖至期□慕視荆□之受□在聖像□□露門  
及□□□作斯為募工人□聖王□□□廢基□□□□翌  
年起小□□□人有□特暴露像得以芘籍帳供於開元□

□□居之岩□之聖佛自是僧居且安相繼增緝一皆□固  
暨我宋建隆初 勅有古寺故籍供本□俾度門人時住

持者普□之徒□□□等□□門人其間卓爾可稱者雲速  
其人□□十數年間一新其院又重建護碑問功□□初安  
慈氏羅漢□其上皆飾以金次西砌五十三佛殿五間朱漆  
其帳以安聖像度所費僅萬緡自備其一一出衆助□然師  
克勤□身躬耕節儉情□□餘歲嘗□優饒是亦人之難能  
也况佛之德以無心□俗累為自得以解脫淫濁為俗範惟  
師為能之□高足衣則不華食則不重同於流俗而實離塵  
可謂出於其類茲又人之罕至也治平年中嘉譽上達衆與  
其善因□ 勅以治平號其院焉噫師享年八十七僧籍  
六十四紹聖六年十二月二十七日無疾而終門人 崇珪

崇仙等塋寺之西北隅起幢為紀示不忘也崇珪緇家幹蠱  
有方砌建觀音閣五間連樓大殿輪奐殿中壯麗增級丹腹  
煥耀自是車馬□益皆趨上善緇開爰路鑿□石使其冷垣  
□桂未免鋸齒之阨然庫有積粟足以延厥徒堂有大士足  
以□法輪斯亦一時之懿歟永慶實法眷普俊之裔住大陽  
村資聖寺日雲惠度門□永琮等雲清度門人永慶等其於  
雲速乃普□之徒歟今先師雲清乃法眷之列序矣今既宰  
□公實德見於住持之能所義不忘乎法眷因請其□來以  
敘先師之勤劬俾後徒知尊卑之序以明修□廢興之終始  
見祝為記義實難辭直書其事用□□珉崇寧五年丙戌七  
月庚寅朔十一日

資聖寺講經論沙門永慶撰記

山名志卷之六  
住持沙門崇珪 立石

供奉住僧崇仙

此重建治平院記沙門永慶撰記雲速册修之功及其生  
卒年月模黏特甚通志金石記未著錄

惠應廟牒記

碑高九寸八分廣一尺八寸十  
二行行九字正書今在屯留縣

縣東北二里有古張厚泉龍潭祈禱響應尚志以其實聞於  
有司有司以其狀奏焉

天子勅名惠應謹勒諸石用傳不朽

崇寧五年十月日

縣令臣許尚志謹顯

將仕郎主簿臣江憲道

將仕郎縣尉臣高順孫

宣德郎致仕臣王誥書

儒林郎臣雍宗孟立石

按屯留縣志惠應廟額宋崇甯四年二月勅賜尙書省原牒石刻今尙完具此碑記賜名原始爲縣令許尙志撰尙志事無考屯留縣志列宋時知縣有尙志名疑卽據此碑錄入又縣志藝文類載尙志所撰文標目爲惠應祠記文與此碑悉合存之可見當日享祀豐昵上下皆然風尙旣乖遂釀奇變良可慨也宋史職官志將仕郎從七品宣德郎正七品儒林郎正九品此元豐以階易官之制至政和時宣德改宣教將仕換迪功與此又異矣地理志隆德府本潞州屬縣八其二曰屯留隸河東路碑見通志金石記

西山治平寺莊帳記

碑連額高二尺七寸廣二尺五寸五分二十行行十八字額題八字均行書今在陽曲縣西三十里虎狼山治平寺

西山治平寺莊帳記并序

物之廢興雖係乎數而事之理亂寔由乎人西北距太原城二十里有 詔以治平名其寺者即古并之雲谿也道人隕公嘗居焉有能詩口頗為縉紳先生所推重陳文惠之鎮并也口口口口賁山谷由是檀施交至就座之徒晨暮懇請惟恐其後逮隕公沒數十年間鼓板鐘魚寂寥不嗣我有田疇他人是保頽垣壞屋僅有存者中有義永落髮未幾為眾所推遂主其事義永雖文藻口逮隕公而業履精進過之孟衲之外無餘資所謂拾枯松煮瀑布者也復故起廢殿宇屹然可觀嗚呼余之所謂事之理亂必由乎人者豈不信

哉然執券誅負之家未盡去門而其徒已有誣告者矣

邑大夫張公神明其政乃曰義永之幹局豪戶之兼并吾  
與聞之矣遂首正其罪仍以狀聞 帥庭盡根枯舊產以

付義永又命刻石以誌之余既嘉義永之能嗣家風又喜

吾邑大夫之政雖深山窮谷之中幽微必燭因援筆記  
之而無辭

大觀二年五月望日晉陽焦稹序并書

按太平寰宇記西山治在大通監西文谷內此宋時言西  
山所由仿今山西通志謂山在羊腸之南出陽曲交城間  
面汾川者爲太原之西山如嬰山蒙山龍山臥虎山仁山  
崖山壺屏山者皆是方輿紀要蒙山在太原西北五里其  
山連亘深遠或以爲北山或以爲西山又引宋白曰大通



監本古交城地與通志說悉合是則西山者通指郡山面汾水者言固不獨一峰一壑已也通鑑長編太平興國四年五月戊子毀太原舊城以榆次縣爲并州七年二月復徙并州於三交寨注云三交寨卽陽曲縣嘉祐四年十月癸酉復以并州爲太原府記作於大觀二年其云距太原城二十里仍卽指太平興國七年所徙三交寨而言爲今陽曲縣地治平寺據今縣志在今城西三十里虎狼山宋大觀二年立與碑所言二十里者稍不合或志誤耳陳文惠名堯佐字希元閬中人官至同中書門下平章事卒贈司空事具宋史本傳又據長編天聖三年三月丙子徙知河南府樞密直學士陳堯佐知并州文惠帥太原頗有惠政史言其植柳數萬本以捍汾流民賴其利此記云文惠

鎮井闕 資山谷植施交至是能修舉廢墜者又云以狀聞  
帥庭案大觀二年帥太原者爲陶節夫見長編拾補及宋  
史

曇延洞祈晴碑

碑高一尺七寸八分廣一尺一寸二分  
分八行行十二字正書今在永濟縣

永興路走馬承受岑鎮與蒲中官屬同登棲巖寺祈晴于曇  
延師像因得遍覽勝槩大觀四年四月二十七日

將仕郎河東縣尉侯彥洵

將仕郎河東縣尉朱原

登仕郎法曹叅軍張似之

承直郎行節度推官趙子琛

通直郎知河東縣事孟長民

朝奉郎簽書節度判官廳公事郭玉豐

皇城使鄜延路第八副將劉溢等立石

按碑刻永興路走馬承受岑鎮與蒲中官屬同登樓巖寺  
祈晴於曇延師像因得徧覽勝槩大觀四年四月二十七  
日按曇延蒲州樓巖寺僧隋開皇間旱命延禱之甘雨大  
注見通志宋史本紀政和六年七月辛酉改走馬承受爲  
廉訪使者碑立大觀故猶題走馬承受碑所題官有將仕  
郎河東縣尉侯彥洵將仕郎河東縣尉朱原登仕郎法曹  
參軍張似之承直郎行節度推官趙子琛通直郎知河東  
縣事孟長民朝奉郎簽書節度判官廳公事郭玉豐皇城  
使鄜延路第八副將劉溢等立石太平興宇記蒲州河中  
府護國軍節度故得有節度判官推官又宋史地理志永

興路有河中府

析山謝雨文

碑高一尺四寸三分廣三尺三十五行行十六字正書首題五字篆書今在陽城縣

惟大觀四年歲次庚寅七月戊戌朔十一日戊申朝奉大夫  
權發遣河東路計度轉運副使公事雲騎尉賜紫金魚袋臣  
王桓謹差宣德郎權通判澤州軍州官句學事兼管內勸農  
事借緋臣許奉世敢昭謝于

湯王惟

王不殖貨利

不通聲色天錫

勇智

克君萬邦

德施三代

澤流岡極顧瞻

析城

凜然

□□四隰嚮往

高山仰止方夏長養晉疆□□夙戒郡貳往致忱辭惟

王千載其遠

眷應

如響農田膏潤良苗加秀年成屢豐為

國上瑞敢修故常祗報

殊貺不任精誠欣躍拜

賜之至謹謝

歲庚寅夏六月晉絳閔雨

運使大夫王公按部既事躬禱又諉

通判監丞為晉人有祈

湯祠於是本州雨足翌日平陽亦蒙大霑越七月庚子閭境均浹伏惟

神享

克誠感徹敏速蓋乃

愷悌君子之福也謹刻金石用記歲月

將仕郎權縣尉兼主簿事王道盛

文林郎監酒稅張權

儒林郎知縣事專切管勾學事□□□甲□□公事馬詳  
校太平寰宇記澤州陽城縣析城山頂有池俗傳湯旱禱

雨於此今池四岸生龍鬚草無林木陽城縣志宋徽宗政  
和中勝湯祠曰廣淵之廟加封山神爲嘉潤公通志宋析  
城山謝雨碑大觀四年縣令許奉世撰今搨本題大觀四  
年權發遣河東路計度轉運公事王桓差宣德郎權通判  
澤州軍州管勾學事兼管內勸農事臣許奉世云云則奉  
世非縣令可知通志未見搨本爾澤州府志大觀三年龍  
泉碑奉世結銜亦爲通判軍州事與此碑合考續通鑑崇  
甯元年九月乙未詔中書籍元符三年臣僚章疏姓名分  
邪正各三等於是中書奏正下許奉世等二十二人又見  
溫公集宋制資序已至者則爲正官資序未至者如兩任知州方  
序監司之類則爲權及權發遣桓必資序未至者碑末有將仕  
郎縣尉兼主簿王道盛文林郎監酒稅張權並見縣志儒

林郎知縣事專切管勾學事闕公事馬詳縣志知縣馬祥  
宋大觀四年任疑卽其人按碑王桓結銜有曰朝奉大夫  
宋史百官志舊官後行郎中宣德郎舊官著作佐郎大理  
寺丞政和改宣教郎將仕郎文獻通考崇甯初以換軍巡  
判官司理司法司戶簿尉政和改爲奏補未出官人文林  
郎宋崇甯以換留守節察推官軍監判官儒林郎宋崇甯  
以換節察掌書記支使防團判官此碑立崇甯後政和前  
故不曰宣教郎而曰宣德將仕郎亦係軍巡判官換授而  
非未出官者碑見通志金石記

高繼嵩碑

碑高四尺四寸廣二尺二寸二十八行  
行六十二字正書今在霍州庫拔村

宋故銀青光祿大夫檢校太子賓客使持節保州諸軍事保



州刺史兼御史大夫騎都尉渤海縣開國伯食邑九百戶贈  
定武軍節度使高公神道碑銘

并序

承議郎新差同勾當代州五臺山寺務司并真容院及興  
善鎮煙火巡檢公事王邇撰

姪孫皇城使充晉州兵馬鈐轄上柱國保定縣開國男食  
邑三百戶口洵書

文思副使充晉州兵馬都監兼在城巡檢武騎尉邵祁篆  
額

惟高氏爲河西大姓世有顯功勳在王府威震夷落自

領軍而下枝分派別散居於延安綏德平陽者不知幾  
何人本其忠義相傳繩繩翼翼大者侯封小者材進雖山西  
氣俗漸磨使然而大門功德畀付有以

高祖諱思

字下一

仁宗廟諱仕唐末以破賊勲爲工部尚書綏州刺史領軍諱

君立公之大父也父諱文岷始爲本州衙校以計

破叛羌逆謀殺其愛將卒完城以歸于本朝太

宗嘉歎委以邊任終汝州防禦使累贈定國軍節度使

公即定國第三子也諱繼嵩字惟嶽以將家子結髮從

戎有志於功名故歷任未嘗不在邊要而所至有威聲治狀

可述真宗東封霈恩授右班殿直祀汾陰禮成

轉左班殿直定國遺表轉右侍禁差晉州兵馬監押就

徙晉隰同巡檢用方略捕殺強賊史胡子以功賜勅書

獎諭改左侍禁又遷供奉官移秦州床穰寨兵馬監押累戰

以多就移環州管界巡檢時吐蕃叛命公以輕兵入討

焚燒族帳殺獲甚多西賊畏服納降乃還朝廷疇勞特

授閤門祇候移晉州兵馬都監改晉隰等州都巡檢使就徙  
原州駐泊都監兼沿邊巡檢使先是環州招降吐蕃酋豪數  
十族聞 公來競越境奔走持物以獻 公犒勞撫慰

而遣之其威惠感人心如此就差知原州移知鎮戎軍龍圖  
閣學士王博文舉 公寶曉軍機諳練邊事轉內殿崇班

坐公累移陝州駐泊未幾轉內殿承制移知火山軍改禮賓  
副使充邠<sub>寧</sub>環慶路駐泊安撫都監知環州累遷西京左藏  
庫使 公勇而有謀臨敵未嘗挫折前後屢奏勝捷

仁宗遣中貴人傳宣記錄姓名將以擢任至是乞 朝覲

稟邊事 詔俞其請到 闕侍射後苑一發中錢孔賜

銀絹一百疋兩襲衣金帶奏對稱 旨擢授昭州刺史知

慶州有成卒謀爲亂遂指揮使周美欲殺之美挺身歸公衆

畏 公不敢動縱其餘黨誅首議者十七人降 詔美

之美官至節度使復移知鎮戎軍羌人素畏 公名望風

遁去邊境清肅民立生祠至今奉祀不怠又遷保州刺史當

時大臣范文正公韓魏公最知 公爲可用力薦引之嘗

命副魏公爲契丹國信使以疾免魏公亦以 公故辭不

行康定元年九月七日以疾卒於鎮戎軍之正寢享年五十

有九諸孤護喪歸平陽以慶曆七年二月二十一日葬於霍

邑縣永太鄉庫拔村有故人焦拱實銘其墓 公娶史氏

封河南縣君生子男八人永信永友永誠永堅永洙永奇永

享永宣後以子貴累贈 公定武軍節度使諸孫蕃衍碑

陰焉譜以系之大觀二年 公之姪孫洵爲皇城使揚歷

二廣間 朝廷方且選任皇城君口羣從游宦四方族中

旅殞而未葬者六十人慨然怛傷以諗

朝廷恩許移本

州兵馬鈐轄聚族營辦富者輸貲貧者効力二年之間以畢其事而夫人史氏口是而合葬焉且謂公功烈如彼懼

其無傳欲立碑以表其墓以行狀求求文於通邇鄉里後進也猶及識公之二季永奇永亨今皆亡矣永奇輕財重

義渾厚長者永亨沈鷺好謀恢廓有大志所至立奇功尤知名於時亦可以繫見公之遺範亦嘗拜公之畫像

真一時英偉人也辭不獲免因爲論次之如此史氏謂三世爲將道家所忌東漢耿氏自況而下累禁以功名自終其獨能隆於當時者豈徒然哉觀定國公保全綏州以五縣

之衆歸于我朝使其人去彼囚虐復爲王民方其

迎拜鼓舞樂趣

皇化其功德被入者豈有窮邪宜其後

世爵祿未艾天之報人固其理也銘曰

大河之西 高氏世顯 赫赫定武 蚤以才選 謀之

具臧 勇于義戰 帝用疇之 委茲方面 公之未來

犬戎遘難 公之既來 克除克翦 稽首服從 威

靈大口 凡此武功 虎臣蹇蹇 定國勲賢 于何不

善 綏城之衆 免爾塗炭 豈惟其免 彼爾冠冕

有施有報 其報必遠 公子公孫 公侯衮衮 忠義

有本 無忝履踐

大觀四年十一月二日立石 郡人牛美刻

碑陰

八行額題定武軍節度使高公墓表碑陰十二字均正書

長男永信

三班差使并白氏墓從西第二料丙穴

孫世清

墓從西下第世萬墓從西第四料壬穴

西下第四  
料甲穴  
清三子惟  
簡三子居  
定三子居  
和宜二子居

榮萬四子惟  
正一子居  
岳一子居  
福三子居  
廣二

子居  
次男永友  
二班差使并王氏  
孫世忠  
葬從西下第  
世

元  
葬從西下第  
世緒  
葬從西下第  
忠一子惟甫甫一子居

元一子惟新新五子居  
緒二子惟  
貴貴二子居  
景一子

居  
次男永誠  
三班借差并郭氏  
孫世明  
葬從西下第  
世

德  
葬從西下第  
世長  
葬從西下第  
世安明一子惟熊熊五子居  
德

一子惟  
一子居  
長二子惟  
義義二子居  
順師二子居

雅安三子惟  
鎮一子居  
用三子居  
俊一子居  
次男

永堅  
內殿承制并長壽縣君趙  
孫通  
從七太尉  
選戰歿永樂

達  
從七太尉  
適堂葬第二  
通二子  
湛皆堂葬  
選二子澄

堂葬第二  
演演一子居  
達二子  
浩次男永洙  
內殿承制并  
長安縣君魏

料  
穴

氏葬從西第孫遜右班殿直副逢從七太尉遜一子汚次男  
三料丙穴孫遜第三料丙穴逢破永樂遜一子汚次男  
永奇左藏庫副使并崇德縣君孫建侯左班殿直副建侯一  
路氏葬從西第三料王穴孫建侯第二料甲穴建侯一  
子癸一三子次男永亨從西第三料甲穴次男永宣頭  
供奉官葬從西孫建初初一子榮  
下第四料丙穴

大觀四年十一月二日姪孫皇城口晉州兵馬鈐轄上柱  
國洵立石 孫婿劉衍書

朱建一管勾刊字

按通志金石記云繼嵩卒於康定元年以慶厯七年葬霍  
邑永泰鄉碑為其從孫洵追樹故碑陰刻子孫譜系甚備  
撰文之王邇臨汾進士故自稱為鄉里後進繼嵩以父定  
國軍節度蔭由殿直累知軍州碑所述事蹟如為晉隰州  
巡檢用方略捕殺強賊史胡子在環州平吐蕃之叛知慶



州定戍卒之變其事皆不見於史又稱其遷保州最爲范文正韓魏公所知力薦引則韓范之經營西夏正其卒之年也今考繼嵩宋史無傳長編明道元年九月甲戌繼嵩坐掩擊敏珠爾失利由知鎮戎軍內殿崇班閤門祇候降爲陝西

西字據碑當作州字

都監寶元元年八月丙子以左藏庫使

副右司諫韓琦使契丹賀正旦琦言繼嵩昨知環州因軍士得遺箭係匿名文字言繼嵩將叛繼嵩心不安乞還朝臣察其事之僞者有二辨其惑者有一繼嵩久在西邊頗以勇敢聞謂宜急遣繼嵩還邊其元告匿名文字亦乞論罪如律以堅繼嵩用命之心庚辰詔繼嵩復知環州九月庚戌繼嵩以左藏庫使領昭州刺史爲環慶鈐轄兼知慶州二年四月丁卯環慶鈐轄高繼嵩言今元昊將舉兵寇

延安請令石隰州發五關塞捉生兵夜濟大河入定仙嶺  
鐵箆平設伏掩襲從之五月丙午繼嵩徙涇原鈐轄又慶  
厯三年十月甲辰注范祥本傳云康定初通判鎮戎軍知  
軍高繼嵩死趙元昊圍城甚急祥帥屬將士拒退之又康  
定元年十月辛卯鄜延鈐轄供備庫使忠州刺史朱觀爲  
崇儀使涇原鈐轄兼知鎮戎軍繼嵩事見史者如此據碑  
言繼嵩以知鎮戎軍坐公累移陝州駐泊卽指掩襲敏珠  
爾失利坐降事至其由環移慶碑謂其以侍射後苑奏對  
稱旨而授與長編所載韓魏公論繼嵩因匿名文字懼罪  
還朝迥不相同且未移慶州之先尙有復知環州之詔碑  
亦弗詳其殆有所諱歟碑言繼嵩卒於康定元年九月初  
七日長編注謂康定初繼嵩死於鎮戎圍城中與碑適合

朱觀以是年十月辛卯兼知鎮戎卽代繼嵩蓋其卒以九月而朝廷十月始聞之耳碑於繼嵩仕履不詳年月長編則一一具書頗得梗概魏公使遼不行長編失載其事碑謂以疾免足補史闕又寶元二年知延州范雍言涇原路卽鎮戎軍渭州城壁堅固況高繼嵩累任使賊眾不敢輒進由是以觀繼嵩在西邊度必有威重素號名將者也繼嵩父文岷史亦無傳惟高永能傳有云永能世爲綏州人伯祖文岷舉州來附卽拜團練使長編太宗淳化五年四月甲申詔以高文岷爲綏州團練使碑所謂完城歸朝太宗嘉歎授以邊任者是也韓琦范仲淹爲陝西經略安撫副使並見長編康定元年五月己卯又天聖九年王博文以知秦州龍圖閣直學士兼知鳳翔府此碑稱博文舉公實

曉軍機度繼嵩知原州移鎮戎軍亦必在天聖末年也周  
美靈州回樂人官至耀州觀察使馬軍副都指揮使卒贈  
忠武軍節度使謚忠毅宋史有傳碑陰所稱七太尉卽高  
永能官至四方館使榮州團練使元豐五年九月戰死永  
樂城贈房州觀察使事詳宋史本傳及通鑑長編碑見通  
志金石記

山右石刻叢編卷十六